

von Wulf Wager

's isch nemme des!



Weihnachta isch oifach nemme des! Do hockat se fröhlich om da Chrischtboom rom ond sengat "Ihr Kinderlein kommet", drbei schluckat se jeden Dag dia Pille. Wikileaks veröffentlicht jetzt schon Wunschzettel an da Weihnachtsma, ond dr Nikolaus guckt über Google-Streetview, welche Häuser an Kamin hend.

Vor der Anstalt für Arbeit vertoilt dr Nikolaus "Arbeitsplätzchen" ond 's Tanka isch so teuer worda, dass i mir wahrscheinlich koine

Weihnachtsgschenk leischa ka. En dr Kneipe om s'Eck sengat se "Der Halben jauchzt" ond noch Weihnachtsa stellt dr Nikolaus en Hartz IV-A'trag.

's isch oifach nemme des.

Dät 's Chrischtuskendle heut nomol uf d' Welt komma, dädat seine Eltern wahrscheinlich a A'zeig wega "Verwahrlosung eines Kindes" ond mit em Jugendamt zemliche Händel kriega. Ond dr Wirt von derra Herberg' hätt die Herra vom Wirtschaftskontrolldienscht am Hals. Dr Heilige Josef miasst Kindesunterhalt noch dr Düsseldorfer Tabelle zahla ond dät irgendwann an Vaterschaftstescht macha lau. Dr Keenig Herodes dät vor em Tribunal in Den Haag a'klagt werda. Dia Heilige Drei König dädat mit Sicherheit koi Ei'reisevisum kriega – zumindescht en Bayern –, ond dia Hirta kenntat bloß mit ma klimatisierte Viehtransporter a'reisa. Sogar dr Stern von Bethlehem miasst durch a Energiesparlamp ersetzt werda.

's isch oifach nemme des! Trotzdem: Frohe Weihnachtsa!

Bis näggschd Woch'

Ihr

Alle Kolumna zom nochlesa
ondr: www.woascht.de
oder em Facebook em
Wulf Wager Fanclub.